

Parlamentario Rasmijn

Un instituto manera TNO, ta bay atrae otro tipo di turista pa nos pais

ORANJESTAD (AAN):

Durante conferencia di prensa di e fraccion berde, parlamentario Donny Rasmijn a bisa cu durante un biaha pa exterior pa papia entre otro tocante bahamento di gastonan di energia, el a ripara cu e paisnan den Latino America tin un hopi bunita impresion di Aruba, mirando entre otro e paso ultimamente cu Aruba a tuma di bin cu TNO pa Aruba, pa aplica ciencia na Aruba pa haci testnan.

“Esaki nan ta mira como algo unico, pasobra paisnan grandi mes no por paga un instituto manera TNO”.

“Sinembargo e areglo y acuerdonan cu Gobierno di Aru-

ba a cera cu TNO pa nan por bin akinan y haci e testnan aki, ta un logro grandi”.

Esaki segun e parlamentario, kende a sigui bisa cu esaki ta un logro cu seguramente ta pone cu hopi pais ta jaloers riba nos. El a sigui bisa cu e posibilidad cu esaki ta duna pa nos pais crece ainda mas den turismo ta hopi grandi.

“Bo ta bay haya un turismo di conocimiento, pues hendenan ta bin Aruba pa wak e testnan cu nos ta haci, pa haya sa con cierto sistemanan ta funciona”. Esaki segun Rasmijn, kende a sigui bisa cu TNO ta duna e posibilidad pa haci varios test.

“Bo tin testnan di biento, en-

ergia solar, ‘wave energy’, deep sea cooling cu lo worde traha riba dje y te hasta hydro electric cu nos por bay den dje den futuro”.

Esaki segun e parlamentario kende a sigui bisa cu ora bo tin un pais cu ta genera corriente den e sistemanan aki, e no ta facil. Rasmijn a splica cu ta un conocimiento hopi bon bo mester tin riba e materia aki pa bo maneha e corriente, pa bo ta sigur cu bo cliente ta keda haya corriente na su cas. “E sistema cu WEB ta uza awor caba ta unico, pues imaginabo si nan uza mas manera pa genera energia na un manera mas eficiente”, segun Rasmijn.